



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :

Tir Yimyim

tirymyim@aolima

tir yimyim

TAPAK 8

Assam terenlok atema vote
agüjang: Priyanka Gandhi

Covid tashidak menar senden
amenba atema Pak PM aitsü

VOL. XVIII NO. 163 (ADOK 163) DIMAPUR

AMUNGNÜ (SUNDAY)

METSÜREMI (MARCH) 28, 2021

₹ 5.00

COVID-19 Nagaland: Nisung shingad meputet

Kohima, March 27 (TYO): Honibarnü Nagaland nung nisung shinga dak-a COVID-19 aliba meputet.

"Tanü nisung shinga dak COVID-19 meputet" ta Health & Family Welfare Minister, S Pangnyu Phom-i ashi.

Nisung 12,229 rongnungi 11,979 taneptsü nguogo. Nagaland nung COVID-19 nungi taneptsü angubaji 97.95% lir aser nisung pungu anepaludar, ta paisa metetdaksü.

Nagaland nung COVID-19 puteter nisung 91 süogo saka parnok rongnung nisung 10 bo tanga timtem ajanga asü, ta Health & Family Welfare Director, Dr Denis Hangsing-ia ashi.

Nisung 154 tashi tanga state temi ogo. Tang anepalurtemji Dimapur nung pezü aser Kohima nung ka lir, aser parnok shinga dak-a shirangba yimya mali, ta paisa ashi.

Nagaland nung COVID-19 alitsü akok ta temolung melemi bilemba sample 1,35,859 tendangogo. RT-PCR ajanga 75,325, TrueNat ajanga 37,514 aser Rapid Antigen Test ajanga 23,020 tendang, ta Dr Hangsing-isa metetdaksü.

Hokolbar tashi nung Nagaland nung nisung 59,409 nem COVID-19 vaccines (covishield) agütsüogo, ta State Immunization Officer Dr Ritu Thurr-i ashi.

Nagaland nung nisung 59,409 nem COVID-19 vaccines dose 81,269 agütsü.

Vaccine agirtem rongnung frontline workers 36,232, healthcare workers 11,974, teintet rogo 8,903 aser arishi küm 45 ser temapur 2,300 lir, ta Dr Thurr-i ashi.

Healthcare workers 8,076 aser frontline workers 13,784 tashi vaccine indang dose anaprong agiogo, ta paisa shisem.

Advisor Medo Yhokha-i Angami nung longjemtsü ayongzük



Advisor, Medo Yhokha-i Northern Angami Students' Union (NASU) nung longjemtsü ayongzük

Kohima, March 27 (TYO): Naga yimten tebilemtsü atema Angami Naga nungertem longjemtsüla aser ola ka dang adoktsüla, ta Technical Education & Election Advisor, Medo Yhokha-i tanü ashi.

Naga yimten tebilemtsü ya kija mesüra telok ka atema masü saka iba ya nübertem indang lir, ta Yhokha-i ashi.

Northern Angami Students' Union (NASU) indang 46 buba Biennial General Conference nung pai iba onük jembi.

Tatembang teletmetbaji tajung asütsü mesüra lokti mesüra kin tsütsü temelenshi arutsü akok. Anungji Angami Naga nungertem longjemtsüla aser ola ka dang adoktsüla, ta pai ayongzük.

Angami nungertem taintemi iba tebilemtsü onük atema jungjunga shisatsü lemsateptsüla. Külen, lanurtemi taintemi ashiba pusemba dang masü saka nübertem atema kechi shitak ta asüba atema olemtep nung adentsüla ta Advisor Medo

Yhokha-isa shisem.

Northern Angami Public Organization (NAPO)-i ajemajema melii Naga yimten tebilemtsü nung shilem agitsüla, ta paisa ashi.

Paisa lanurtem dang tarutsü atema renemtsü ayongzük.

Loktiliba tangatetba melenshitsü mapangji tang ya lir. Kaketshirtemi wadang balala indang maongka agitsüla. Tsüraburtemia kaketshirtem nungita yaritsüla, ta paisa ashi.

Alima kanga kara melenshiba putu ka nung asenoki asen sobaliba aser maitsü wazüka ayutsüla, ta Advisor Medo Yhokha-isa shisem.

Iba sentong nung NAPO aser Northern Angami Women Organization (NAWO)-ia shilem agi.

Iba session nung Advisor Yhokha-i NASU Constitution sayatsü aser NAPO President o Angami Students' Union (ASU) President naprongi o tatsütsü jembi.

Holi, Good Friday, Easter benjungtem nung SOPs akangkanga benshitsü

Dimapur, March 27 (TYO): Nagaland home department-i Holi, Good Friday, Easter aser tanga benjungtem nung COVID-19 azüoktsü atema SOPs akangshitsü metetdaksüogo.

India kübok state balala nung COVID-19 prokshiba aser nisung asüba osangtem nung ajemdaker Nagaland home department-i Honibarnü iba tetuyuba agütsü.

Nagaland nung deputy commissioner & district task forces (DTFs) chairman, Superintendent of Police aser

Chief Medical Officer ajaki SOPs lateta aliba akangshitsü atema Principal Secretary to Home, Nagaland, Abhijit Sinha-i tetuyuba agütsü.

Home Secretary, Government of India-i state ajak nung chief secretary tem dangi shidi ka züluba sülen Principal Secretary-i iba sangdong agütsüogo.

Nagaland nung District Task Force (DTF) ajaki nübertem dang COVID-19 nungi jenbua alitsü atema teinyaktsü shitak inyaktsü metetdakjang. Mask enoktsü, nisung o nisung

tsüngda tepila ayutsü aser mapang shia teka metsüktsü shiang, ta tanü Abhijit Sinha-i sangdong nung metetdaksüogo.

Holi, Good Friday, Easter aser tanga benjungtem nung COVID-19 menatepba noktangtsü atema nisung telok tulu madenshitsüla aser sentong ajak nung SOPs aser tetuyuba sülen anidaktsüla, ta paisa ashi.

Maneni, Principal secretary (Health), Nagaland-ia District Task Force (DTF) ajak dang tetuyuba sülen manidaktertem dak ozüangi melaba ama mapa inyaktsü metetdaksüogo.

Assembly Elections 2021: WB nung 79.79%; Assam nung 75.04% shilem agiogo

Guwahati/Kolkata/New Delhi, March 27 (Agencies): Honibarnü Assam nung menden 47 aser West Bengal nung menden 30 atema assembly election mezüngbuba shilem agiogo.

Tanü West Bengal nung vote enoktsür ajak agi 79.79% aser Assam nung 75.04% liasü.

West Bengal kübok tesem kar nung mepetmesü adokba dak alaka tanünga tesemtem nung election tiptema agiogo, ta Election Commission-i ashi.

Purba Medinipur district kübok Kanthi Dakshin

constituency nung EVM mapa meinyakba atema polling booth ka kima nung nisungtemi lungkak ait.

Iba polling booth nung VVPAT slip ajanga party ka nem dang vote enoktsüba sayu ta nisungtemi ashi aser iba jagi VVPAT machine ji melen, ta EC ketdangtsür kati ashi.

Tanü West Bengal Chief Minister Mamata Banerjee-i Prime Minister Narendra Modi aitsü.

PM Modi-i anogo ananü Bangladesh semdangbaji "vote marketing" atema lir aser iba

atema onoki Election Commission tsüngdang ken o benoktsü, ta Mamata-i ashi.

West Bengal nung Trinamool-i BJP aser Congress-Left teloktep den tokteper.

Külen, Assam nung BJP-i sorkar kümsük tanaben inyaktsü teimla nung tokteper.

Honibarnü Assam nung election mezüngbuba shilem nung Chief Minister Sarbananda Sonowal, taoba Speaker Hitendranath Goswami, Assam Congress president Ripun Borah aser social activist Akhil Gogoi nungertem tokteper.

Myanmar Armed Forces Day nung nisung 100 tema khaset

Guwahati, March 27 (Agencies): Honibarnü Myanmar nung sepaitemi lungkak aiter nisung 100 tema khasetogo.

Myanmar indang Armed Forces Day nung azütokshiogo aser yimti 40 nung nisungtem asüba osang angashir.

Honibarnü nisungtemi yimdong nung lungkak aitba mapang Myanmar mitkartemi "shoot to kill" ozüang agütsü.

"Tanü ya armed forces atema maaksü anogo ka lir" ta CRPH otongdar Sasa-i ashi. CRPH ya yimsüsürtemi mitkartem anema tentetba telok lir.

"Military general temi tai maketba civilian 300 de teimba khasetba sülen Armed Forces Day amonger" ta Sasa-isa ashi.

Tanü Police-i nisungtem khasetba dang alia lungkak aiter aika kanga mejungi yirua lir.

Yangon yimti kübok Thamine nung anogo ka tain kinü tanur ka indang noksa social media nung kanga

prokshir.

Honibarnü sepaitemi kinü tanur indang tenük nung 'rubber bullet' agi yirutsü.

Ano, Mandalay kübok Meikhtila tesem nunga sepaitemi arishi küm 13 tanur tetsür ka khaset.

Arishi kü 14 tain tanur tebur ka Railway Compound ka telung nung asaya alidang Myanmar security forces-i khaset.

Maneni, tanü sepaitemisa Mandalay city nung futsal club goalkeeper Aung Zin Phyoo (18) khaset.

Honibarnü Myanmar nung aliba US Embassy kima nunga injang khaloktsü.

"Tanurtem dena teka tazüang civilian tem khasetbaji tetsübuttsüka lir" ta United States ambassador to Myanmar, Thomas Vadja-i metetdaksüogo.

"Sepaitemi iba ama mapa inyakba ya tim masü. Shitakba nungbo parnoki sensotem kümzüka ayutsüla" ta Thomas Vadja-isa ashi.

Paisa Myanmar mitkartem dang ozüang alema mapa inyakba anentsü ayongzükogo.

"Security forces-i parnoki kümzüka ayutsü ta nangzükba civilian tem aser talisa tila tanurtem khaseteter" ta US Embassy-i sangdong ka nung metetdaksü.

"Myanmar indang Armed Forces Day nung sepaitemi civilian tem khasetba ajanga parnok tenüng menükogo" ta British Ambassador to UN - Dan Chugg-ia ashi.

Külen, United Nations-ia nisung tepsetba atema aoksar ta metetdaksü.

"Ozüang alema mapa inyakba magizüker aser tangsa anentsüla. Iba mapa inyakertem merenshitsüla" ta UN-i ashi.

"Mitkartemi yimjung ayutsüba aser nübertem kümzüksüla saka Tatmadaw (Myanmarese Army)-ibo par nübertem anema noktaker" ta UN Special Envoy on Myanmar, Christine Schraner Burgener-ia ashi.

Assam Rifles-i Nagaland nung mapa balala inyakogo



Dimapur, March 27 (TYO): Assam Rifles indang Mon Battalion-i ARPS Naganimora kaketshirtem atema Silver zone International Olympiad 2021 ayonga agiogo.

Taküm January ita Mathematics aser Science Olympiad atema test agia liasü aser iba mapang kaketshir 13 tashi Olympiad atema shim.

Kaketshirtemi gold 7, silver 2 aser bronze medals 2 ngutet aser NE Zone ajunga nungi Miss Sneha Sana-i Rank 1 ngutetogo.

Ano, Jalukie Battalion-ia Peren District kübok Tenning yimtsüng nung medical teyari agütsü.

Arishi küm 4 tain tanur tebur ka mi agi ronger timtema liasü aser AR-i pa nem mapang shitak nung medical aid agütsü.

Maneni, Dimapur Battalion-ia Kushiabil yimtsüng nung kitsükkirong lendong ajuruba kibong nem jang, atta, dal aser shinü agütsü.

March 25, 2021 nü mi lendong atalokdang ki ajunga mitsü küma rongdok. Kushiabil

yimdaklirtem aser Assam Rifles Company-i iba kibong den yaritepdar.

Shamatore Battalion-ia Bolero pickup gari ka tsükokba lendong nung yaritep.

Tuensang district kübok Kuthur yimtsüng nung iba lendong atalokba osang angashiba sülen AR sepaitemi tesem tonga oa yaritep.

Iba lendong nung passenger 9 yirur liasü aser parnok rongnung nisung pungu kanga mejungi yiruba atema Government Hospital Tuensang-i anir ao.

Assam Rifles-i mapang shitak nung yaritepba ajanga nisung takümtem kümzükogo.

Jalukie Battalion-ia Veterinary College Jalukie den yaritepa Athibung Sub division kübok Lilen Kuki aser Phaijolvill nung Veterinary camp ayonga agiogo.

Iba camp ya Centre sorkari inyakba 'Fit India Healthy India' kübok ayonga agi.

Ghaspani Battalion-ia March 26 aser 27 anogotem Dimapur District nung Anti

Drug Campaign agiogo.

AR-i Sovima nung Dimapur rehab centre nung interactive session ka agi aser Kukidolong Village Community hall nung Kukidolong aser Jharnapani nung alirtem asoshi shisatokden ka liasü.

Iba sentong nung Prodigal's Home Rehab Centre nung Psychologist, Imkong-i o jembi aser Prodigals Home nung amonger nisung 20-ia pei pei ajangshibatem lemsatet.

Jalukie Battalion-ia Peren District nung mount Pauna tashi trekking expedition ka ayonga agiogo.

March 27, 2021 nü "Hum Fit Toh India Fit" omen nung ajemdaker parnoki iba sentong ayongzük.

Iba sentong nung ZSUN (Zeme Students Union Nagaland), PTYO (Peren Town Youth Organisation), NCC Cadets, CIDC (Construction Industries Development Council) aser Peren Govt College nungi lanur 132-i shilem agia liasü.

Dimapur nung tasü mang ka angu

Dimapur, March 27 (TYO): ADCP(CRIME) / PRO, March 27, 2021 nü Essar Petrol Pump, Walford Dimapur anasa tasü mang ka angu.

Tasür meteta alirtemi Officer-in-Charge, East Police Station, Dimapur den tongteptsü mepishir, ta paisa atema bener aotsü, ta ashi.

Manipur CMBiren Singh-i 'Yaoshang' salem abener

Imphal, March 27 (Agencies): Manipur Chief Minister N Biren Singh-i Honibarnü nübortem den Yaoshang (Holi) salem metetdaksüogo.

"Sentsü indang benjung Yaoshang ya Meitei nunger atema benjung tulutiba rongnung ka lir. Iba benjung

nung tanur-tain telemsa melii nisung ajaki shilem agir" ta Biren Singh-i ashi.

Manipur CM-isa COVID-19 inyakym sülen anidaka benjung amongtsü aser iba wara ajanga 'thabal chongba' aser 'jatrawali' benjung amongba yimya noktanger ta metetdaksüogo.



March 27, 2021 nü Village Council Hall, Kigwema nung Reproductive Child Health Camp aser Health Camp ayonga agi. Iba sentong nung Health & Family Welfare Department nung taoba Director Dr. Neiketou-i tetushi tejaoker ka ama shilem agi.

Arunachal Minister-i airgun bendanga agütsütsü ayongzük

Pasighat, March 27 (Agencies): Arunachal Pradesh Forest Minister Mama Natung-i state nung ozü aser arem shiruru wazüka ayutsü atema airguns bendanga agütsütsü ayongzükogo.

April 3 nü Pasighat nung Chief Minister Pema Khandu aser Minister of State in charge of the Ministry of Youth Affairs and Sports, Kiren Rijiju na lia airgun

kiburtemi airgun bendanga agütsütsü atema Natung-i ayongzükogo.

Tanü-asüng airguns aser Point-22 (.22) amshi shikariba ajanga state nung arem shiruru aser ozütem samaa aoer, ta paisa ashi.

"Ni Pasighat-Pangin-Aalo, Tato ajanga Mechuka-i ogo saka lenmang nung ozü ka danga mangu. Tim mesüi shikariba ajanga ozü samaa aoba atema temolung raksar"

ta Minister Natung-isa metetdaksü.

Paisa prangpong agi masü saka akhidang beshiba lasang aser sangtem amshia shikaritsü tebilemba ka lemsatet.

Airgun bendanga agütsürtemi PCCF office dangi osang tejangja yoktsüla ta Minister-isa ashi.

Sorkar tetuyuba sülen manidakertem Forest aser Wildlife ozüngtem ajanga merenshitsü, ta paisa shisem.



March 27, 2021 nü Department of Sociology, Jubilee Memorial College-i Mopungchuket semdangdang Mopungchuket Community Tourism Society züngsem den külemi agiba noksa angur. Iba mapang kaketshirtemi Mopungchuket Community Tourism Society nem dust bins agütsü.

Karbi Council CEM-i BJP nem Rs. 50 crore agütsü: Hagrama

Kokrajhar, March 27 (Agencies): Karbi Council Chief Executive Member (CEM) Tuliram Ronghang-i yaküm BTC election agidang BJP nüboyimba maparen atema sen crore 50 agütsü ta taoba CEM Hagrama Mohilary-i tai tongloksüogo.

Bokajan nung Congress candidate Ratan Engti atema nüboyimtsüdang "Tuliram Ronghang-i BJP lennir Himanta Biswa Sarma nem BTC Election nung sentongtem agidang yariteptsü atema Rs 50 crore agütsü" ta Mohilary-i ashi.

"Senji Karbi Anglong Autonomous Council nem lemsütsüba nungi agiteta agütsü" ta paisa shisem.

BTC CEM Promod Boro-ia New Delhi dang BTC region yokdoker, ta Hagrama Mohilary-isa aitsü.

BTC tema nung aliba Bodo nunger ajaki mahajot candidate nem vote agütsütsü kechiyong

parnoki Pramod Boro memetet, ta paisa metetdaksü.

Nisung aikati Congress candidate Engti nem vote enoktsütsü aser pai takok tulu angutsü, ta Mohilary-isa ashi.

BJP-i toktsüba sülen Hagrama Mohilary-i aniba BPF-i Congress-i aniba mahajot nung aden.

Congress-i aniba teloktep 'Mahajath' nung Assam Pradesh Congress Committee (APCC), All India United Democratic Front (AIUDF), Communist Party of India (CPI), Communist Party of India (Marxist), Communist Party of India (Marxist) Liberation aser Anchalik Gana Marcha (AGM) teloktem dena lir.

Bodoland Peoples' Front (BPF)-ia BJP teloktep toktsür 'Mahajath' nung denogo.

Assam nung Assembly menden 126 atema election shilem asem lemsar agitsü aser May 2, 2021 nü votes azüngtsü.

COME ONE, COME ALL

Do visit us at the

SPECIAL HANDLOOM EXPO

AT URBAN HAAT, DIMAPUR

From : 24.03.21 to 06.04.21

Time : 10 am to 5 pm

ENTRY FREE

For Your Safety

Please Wear A Mask

Maintain Social Distancing

PARTICIPANTS FROM VARIOUS STATES OF INDIA. A MEGA EVENT OF EXCLUSIVE RANGE OF HANDLOOM PRODUCTS, DAY TO DAY UTILITIES & DECORATIVE ITEMS, INNOVATIVE & WELL DESIGNED LADIES & GENTS WEAR, TRADITIONAL SHAWLS, JACKETS, BED SHEETS, CUSHION COVER, CARPETS, HANDICRAFT ITEMS, BASKETRY ETC...

ENJOY THE HANDLOOM COLOURS OF INDIA

ORGANIZED BY

Nagaland Handloom & Handicrafts Development Corporation LTD
(A Govt. of Nagaland Undertaking)
Dimapur : Nagaland

SPONSORED BY:

Office of the Development Commissioner for Handlooms, Ministry of Textiles, Govt. of India, New Delhi

Arunachal Pradesh CM Pema-i Vijaynagar semdang



Arunachal Pradesh chief minister Pema Khandu-i Changlang district kubok kinuk nung aliba tesem Vijaynagar nung Yobin kin nuburtem den sensaksemba noksa nung angur.

Assam terenlok atema vote agüjang: Priyanka Gandhi

Guwahati, Metsüremi/March 27 (Agencies):

Assam nung Assembly election agiba mapang Congress general secretary Priyanka Gandhi-i Honibarnü Assam nung aliba nuburtem dang longsoa arua vote agütsütsü mepeshi.

"Ni Assam nung aliba nuburtem aser talisa lanur aser tetsürtem dang tanü polling booth temi telongjunga oa vote agütsütsü mepeshir.. Assam terenlok aser tarutsü atema vote agüjang," ta Priyanka Gandhi-i ashi.

Congress party-i ashiba agi, Assam nung nuburtemi par party atema vote agütsüdar.

"Sobaliba aser inyakyimtem, temeden, terenlok kümzüka ayutsü atema Assam-i vote agütsüdar, Assam-i Congress

nem vote agütsüdar," ta densema lir.

Assam nung Congress-i Priyanka aser Rahul Gandhi den party den lokteper aliba Badruddin Ajmal indang AIUDF aser Bodo People's Front (BPF) teyari agidar.

Assam nung BJP atsüngtoktsü nükjidadong nung Priyanka-i Congress candidate tem atema kanga meranga jembitsüdar.

Gandhi-i election matong tsüngda state anaben semdangogo aser anogo pezü mungzükgogo.

Priyanka-i Assam nung aliba nuburtem matsüngdang "five guarantees" sangdongogo kong party-i sorkar kümtetra Citizenship (Amendment) Act magi kümdaktsütsü nangzükb

Tanga tenangzükb pezü nung sorkar mapa lakh pongu agütsütsü, süngolu nung inyaktertem taa sen 365 kümtsütsü, kibong shia 200 units tashi electricity angati agütsütsü aser kibong nung tetsütem nem teyari agütsütsü atema ita shia sen 2000 agütsütsü densema lir.

Assam nung Honibarnü Assembly constituency 47 nung anepdang 7 ako nungi vote agütsü tenzüka liasü.

Assam election mezüngbuba shilem nung upper aser central Assam kubok district 12 nung assembly constituency 47 nung vote agütsüogogo.

Mezüngbuba phase nung voter 81, 09,815-i, candidate 264 dak tema nem vote agütsütsü.

BJP-i tashiyim amshia vote agütsüdaktsü: Utpal Dutta

Guwahati, Metsüremi/March 27 (Agencies):

Lakhimpur constituency nungi MLA aser AGP candidate Utpal Dutta-i Honibarnü, BJP aser Ganashakti party züngsemtemi pa pusemertem kangshia BJP candidate, Manab Deka nem vote agütsüdaktsü, ta ashi.

Assam Assembly elections mezüngbuba shilem nung Lakhimpur constituency nunga Honibarnü vote agüja liasü.

"BJP aser Ganashakti züngsemtemi tanü Lakhimpur constituency kubok polling station 197 nung onok pusemer kar kangshia BJP candidate nem vote agütsüdaktsü. Iba ya

inyakyim anema lir, kechiyong shingai nisung ka kangshia pei candidate nem vote magütsüdaktsütetstü," ta Utpal Dutta-i ashi.

BJP aser AGP nati Assam Assembly election nung tangatettep nung vote agütsütsü asoshi mulungtepaka iba tatalokba ajanga BJP aser AGP na telung nung mangatettep aliba sayur.

Kasa mapang nung nuburtemi AGP MLA dang North Lakhimpur ward number 11 nungi ainshitsü akhang kechiyong pai voter kar pa nem vote agütsüdaktsütsü atema mesüzüktsü meranga liasü.

Lakhimpur district nung legislative assembly constituency pezüprongla nung vote kanga süngjem agütsü tenzüka aser Bihpuria, Naoboicha, Lakhimpur aser Dhakuwakhona constituency tem nung vote kara agütsüyonga aoba osang agüja liasü.

Ajisüaka district kubok polling machine kar nung timtem adokba ajanga vote agütsüba inyakyim nung kongshiogo.

Ujjalpur LP School, Lilabari LP School aser NL College polling station tem nung EVM mapa minyakba ajanga vote menor agütsü tenzükb osang angazükogogo.

Itanagar, Metsüremi/March 27 (Agencies):

Arunachal Pradesh chief minister Pema Khandu-i, Changlang district kubok kinuk nung aliba tesem Vijaynagar nung Yobin kin nungi nuburtem den sensaksemba liasü.

Tanü tashi Vijaynagar-i gari otettsüsa lenmang yanglua mali, koba Changlang district kubok kinuk nung lir.

Hokolbarnü Yobin nungertem den sensaksemba mapang chief minister-i parnok tebilemstütem asadanga liasü.

Pai parnok dang yakta Vijaynagar tonga gari senzütettsüsa lenmang yanglutsütsü nangzükb den sorkari kinuk nung aliba tesemtem gari lenmang agi sendakteptsütsü atema maparen benoka inyakdar ta ashi.

"Lenmang yangluba ajanga Vijaynagar nung terenlok bener arutsütsü aser local lanurtem ayangtsü asoshi maongka agika

agütsütsü," ta Khandu-i ashi.

Tenem nung aliba Vijaynagar tesem ya tayimtsü ajang dang tonga oteter aser ibayongji iba tesem nung aliba nuburtemi timtem aika ajangshir.

Vijaynagar nung advanced landing ground lir, kong fighter jets aser tayimtsü tulutem anenteter.

Indian Air Force aser Indian Army-i iba landing ground ya 2019 küm yanglushia liasü.

"Lenmang den külemi terenlok bener arutsü aser iba ajanga taküm libaliro tajungba kümdaktsütsü. Miao-Vijaynagar lenmang (157km) den atonga aliba Yobin nungertem kanga meranga inyakba nisungtem lir. Vijaynagar-i aoba mapang Yobin nungertem den ajurutepa parnoki anogoshia ajangshiba tebilemstütem lemsatepogo. Parnoki ni kanga pelashishia agizükba atema kanga pelar," ta Pema Khandu-i tweet asü.

Tinsukia school ka nung kaketshir 34 dak Covid-19 putet

Guwahati, Metsüremi/March 27 (Agencies):

Assam health minister Himanta Biswa Sarma-i state nung nuburtem dak Covid-19 tashidak kanga ajema putetdar ta shiaka taoba ghonda 24 tsüngda nisung 36 dak Covid-19 tashidak putetogogo.

Sarma-isa, state mokdanga ayutsü atema kecha nungdak madoker aser nuburtemi takümbo Bohag Bihu benjung mungtettsü, ta ashi.

Tashidak putetertem rongnung Tinsukia district kubok Bordubi tesem nung amenoker aliba Kasturba Gandhi Balika Vidyalaya School nungi kaketshir tetsür 34 densema lir.

Kasa mapang nung iba residential school matron aser cook daka tashidak keta aliba putetogogo.

Kaketshirtem ajak tang Tinsukia Civil Hospital nung temang anepaludar.

Honibarnü Assam Assembly elections mezüngbuba phase nung vote agütsürtem aika adenshia vote agütsüogogo anungji

Covid-19 tashidak menar tang dang nungi anasü agi timba akümtsü akok.

Upper Assam kubok district 11 nung Honibarnü vote agütsüogogo.

Covid-19 inyakyim kubok face masks asemstü aser hand sanitizers amshitsü atema polling station ajak nem tetuyuba agütsüogogo, ajisüaka iba kija yagi tashidak menatepa aoba menokdangtettsü.

State kubok tesem balala nung election rally tululu ayongzüka agiba ajanga tashidak menatepa aotsü lendong anasü tuluba kümdaktsüogogo, kechiyong yimden yimsüsürtem densema nuboyimba sentong nung shilem agirtemi Covid-19 inyakyim sülen manidaker.

Assam nung tang tashi nung nisung 2,18, 175 dak Covid-19 tashidak putetogogo.

Tang tashi nung iba tashidak agi state nung nisung 1,104 süogogo, ajisüaka taoba ghonda 24 tsüngda tashidak agi asüba osang mali.



March 27, 2021 : Golaghat district nung (tabelen) BJP aser AGP alliance candidate Atul Bora-i vote agütsüba sülen pa temeyong nung shihai nülöker aliba sayuba noksa nung angur. Dibrugarh district nung vote agütsüba sülen (Tachichi) Assam CM Sarbananda Sonowal-i pa temeyong nung shihai nülöker aliba sayuba noksa nung angur.



TIR YIMYIM

YIMOBILEM (EDITORIAL)

DIMAPUR AMUNGNÜ, METSÜREMI (MARCH) 28, 2021

TENLA KI MERÜKTETBA

Yisu alima nung mapang tatsüka alidang, Paji Kibuba aser Tsüngrem chir ta yimjak nung metetdakja Yirusalemi aiba anogo bilemteta amongba amongnūji tanü ya lir. Iba anogomong dang " Palm Sunday" ta ajar. Palm tetezü asangdong aser iba tenüng ya Yisu Yirusalemi aidang nisungtemi asangdong nungi kongsang lepzüker lemstsüba nungi jajetba ka lir. Atangji, Tsüngrem chir Yisu Khrista asoshibo iba anogo ya Paji tarutsü aliba Messiah ta yimjak nung metetdaksüba aser Yirusalem tenla ki merükteti aoba sentong ka liasü. Pa gado rongdong nung mener aodang telok tulu Pa sülen aser Pa jakdang ao aser item jagi kari Pa aotsüba lenmang nung pei abena aliba sü agizüka lemstsü aser kari asangdong nung kongsang kuzüka lemstsü aser telokti jagi Hosana tetezü 'onok kümzükang' ta ayimtenba tatalokba otsü Mathi 21 aser Mark 11 nung shia angur. Tetezü nübortem jagibo Yisui Tsüngrem chir, alima meimchir kümzüktsü asoshi aruba Messiah ta amanga liasü. Aji oda, tanurtemia dena Yisu Yirusalem tenla ki tonger külena "onok kümzükang" ta ayimtenba asenoki Mathi tapu nungji angur. Asenok kümtetdakba Yisu Khrista pa alima nung alidang telok tului meketbanger Pa tenüngsanga, Pa amenba gado tsüng agi dena ali nung majemdakdaksüi sü aser asang tu manung jajadakja Oliv tenem nung aliba Bethfage yimtak nungi Yirusalem tashi takok ngua aiba anogo asünungji, asenoki iba anogo ya Yisu Yirusalemi takok ngua aiba anogo indang jembia amonger. Aji oda, asenoki Yisu amenba gado aser nisungtemi Hosana ta ayimtena Yisu Yirusalem atongba indang jembidang, aiben asenoki Yisu Khrista Yirusalemi aiba nükjidong indang bilemdangtsüba temulungi marur. Ajisüaka, asenoki Yisu Khrista Yirusalem atongba tashi jembir, Pai Yirusalem tenla kidangi tur inyakba mapatem indang angatettsü memerangra asenok Palm Sunday amongba anogo nükjidong matongtsü. Yisu ya Yirusalem yimti nung anenzüka amongtsüba aiba masü saka shitakbabo Yirusalem tenla ki menena aliba merükteti aiba liasü. Iba jagiang, Pa Yirusalem yimti tonger Pa indangindanga Yirusalem tenla kidangi atuba asenoki azünger. Mark tapu nungbo Pai Yirusalem tenla ki agi shishilembaba aser sen melenba mapatemji ngur, kecha meshii dang Bethani yimtaki oa adok aser tanünüang arua Pai yangji shishilembar aser sen melenertem menden ajak meküpdoka arizüka yok ta shia angur. Atangji, asenok asoshibo anogoji tongtibang masü saka Yisui Yirusalem tenla kidang shishilembartem aser sen melenertem menden meküpdokja aridokba aser yangji inyaker putir aser ketdangser tulurtem dang nenok ya 'auer telok' ta aija ashibaji asütsü. Iba kasa mapang Yisui Yirusalem tenla kidang alir putir aser ketdangsertem dang, Yirusalem tenla ki ya senotsü ajangzüktsü asoshi yangluba shishilembaba tesem ka masü saka kin ajak asoshi "Sarasademba ki" asütsüla ta ashibaji, tanü tensa nung asenok dang ashir amai angateter. Iba tatalokba ya bilemteta tanü ama Palm Sunday amongdang, Yirusalem tenla ki ama asenok tenla kitema topur junga yanglur asenok Tsüngrem külemtsü adenshia alidang, asenok tenla kidangia Yisu arunungbo, Paia asenok dang kechi shila ta shisabolua bilemer ? Ashiko, Pai Yirusalem tenla kidang alirtem dang ain adoka auer ajaba ama asenok danga 'auer' ajatsü akok ! Aji oda, Yirusalem tenla ki agi bazaar kümdaktsür alirtem dang iba ki ya bazaar amentsüba ki masü saka sarasademtsüba ki ta ashiba kasaji asenok danga ashitsüa akok ! Atangji, kodang asenok tamang jenjang bilemdangdir, asenokbo Yirusalem tenla kidang alirtem dang nungi tamajungba asütsü. Asenoki Tsüngrem nem agütsüba tershilem aser temulunger tenla agi tenla ki topur junga yangluteper, saka yangji anepdang aonung sarasademmer mali kümogo. Aji oda, tenla kidang sarasademtsüba asenok asoshi maksü mapa ka amato kümogo, kechiyong tenzükertemi anir telok sarasadem mapang agidang, khuret agi aser tenüngsang agütsüba agi manentet aser maremtet ola tulu adoka sarasademtsü melen tesü asür mali, kodang kong shibai atemar memetet 'Amen' ta külemia meshitet sarasadem mapang atemer. Ibaji tanüla rosepba tamaisü lir. Kodang asenoki tenla ki ya rongsen bendenba aser tema tazütsü agi Tsüngrem külemba tesemang ka kümdaktsür, asenok sarasademtsüji takong kümadoktsü. Ajisüaka, Palm Sunday ajanga asenok nem inyakdaksünübaji asenok tenla kiji "sarasademba ki" südaktsütsüla. Atangji, Tsüngrem tsüngdangbo shitakba tenla kijibo asenok temang aser asenok temulungjang ya lir 1 Korint 3:16 nung ashir. Iba tenla kiji bushia tanü Yisu arur. Atangji, asenok temang aser temulungjang kanga menena lir. Ibaji merüktettsü Yisu arur, asenokia temulungjang ajak agi Pa dang 'Hosana' ni kümzükang ta ayimtendi. Pai kümzüktsü aser aneptsütsü.

OLEMSABANG

YIRUSALEM NUNG TANÜ LANGKA ATALOK ASÜ !

~ Mrs. R.Mapukala Pongen, Merangmen (Tzürangkong)

Tanü ya kechi atalok ü Yirusalem yimdong nung, Tzüim tulu arüba ola medem,ali poker kodanga mangashidangka. Anüngtsü kelen nungi tatem tashi tanganütsü ola asü, Kodak tzünglular ola yangsema,ya angashir shinga süngjema melitet. Tekong,tenem ajaklen metangokja,ozü sangnutema dena puwa-atok. Süra shidakba ya Kodak aser ali chuba ta Tebu-i nangzükba anogo masü no!

Pilemdangango! Ya kechi tetamatsü nisung ka, Ya Nazaret nungi soa intetsang Yisu to südi na! Ibai süng mistriba-er chir to masü no! Tajung dang inyaksang,aria pilemsang,taküm ajonga meimchir asoshi, Ni tenlati ta Tebu chuba menden menükshi-i tilatiba kümer, Tsüngrem chir sür nung alar katia memeyong asen kuret aben.

Tarutsü tia ajak Yisu-i meteta liasü,Pa akümüli tempangtsü anasa lir ta, Alimai sentok-aka,rishikangshi-aka,iba-i asoshi ni alimai aru. Saka ni meimchirtem dang kü tetoshi sayutsüla, Ano jungi Tebu-i renema yutsüba mapa ka, alimai ya menokdangtet. Gado Kiburi-a menongnangi Yisu amentsü mela. Reprangang...Gado ya koda tongmelang aser tashi tanga ajemalu shiruru.

Ali meimchir rongnung chuba menden nung amenertem ajak, Akha ka ama par mapang tataktet ka dang. Nübortemi pa tushi-aka,lemang nung sü lemja makizük. Kodak aser ali chuba ta mayimten. Kechiyong alima yimsüsür-tembo pa mapang tempangerbo mepilemteter. Yamaiji ali nunger konang aser tetoshibo yakta remzüka oa-atoker.

Saka tanü YIRUSALEM yimdong piyong Nazaret nunger Yisu tushiba-ji, Koda tesügmangtsüka liasü ali aser kodaka arakzüa, HOSANA! ta ayimtenba ola-ji tsüngmok amoker den sako liasü, Anüng aser ali süia oaka,Yisu titi Chubatsü ta ayimoktsü. Pa dang tematiba Tebu,yimjung chuba chir ta ajatsü. Tulutiba nungi tilar tashi-i asang süngojong ayipzüa washitep.

Pa anemertemi süngmangset,asangur Yisu ya komala ka, Karbo mit atoka jokzütep,karibo anemsü agi ayimtena sayu. Karibo Pa tai pushitsü tenzü,elok elok ayongtena tasa palala yanglu. Kodaser Kodak aser alima nung pa chubatsü,teko nung tsünga tepo ashiloktsü Saka shidakba pa meimertemi temolung ajak agi pa asang. Ali poker kodanga mangashidangka ola tulu agi yimdong asüng.

Pelatepdi! Oh khristantem,asen olai kibur sangdi, Jungkai atoka sayutetogo,ali shisatsü aser tashi agi menokdangtet. Pai nisungtem mayongten,ayimtena pa tushiang ta mashi, Lemang nung sü lemjang aser süngo jong ayipshia Pa tushitsü mashi, Saka tanü anogo ya Tebu Tsüngrem sentong tulu jongkai atokba anogo, Arung,tanü asenok-ia asen molung ajak agi ayimtena pa sanga shidi. HOSANA ! TSÜNGREM TENÜNG NUNG SHIBA ARUR,PA TENÜNG SANGANG !

KHRISTAN TAJUNG KAJI TENLA KIDANG TANG KHRISTAN TAJUNG KA KA MESÜ-I, TESEM AJAK NUNG KHRISTAN TAJUNG KA KA TA PEI SASA MAPA AGI KULI SAYUTETTSÜLA

- R. Imkong Lkr, Mangimen Area, Nahorjan, Karbi Anglong, Assam

Tanü khristangpur aikati pei taküm shiaji khristan tajung ka ka ta bilema alitsü südi; saka asenoki pei taküm liba liro yimya agi khristan tajung ka ka ta mapa agi mesayutetra item dangji khristan tajung ka ka ta koda ser shitettsü? Tanü khristanpur aikati Deobar, Bodhbar aser Honibar anogotem nung tenla kidangbo khristan tajung ka ka ama ajem ajema kanga tepur junga mentepa sayuteter, saka kodang tenla ki doktsür oadokdir, "outside the churches" pei taküm liba-liro yimya ajanga asenokji khristan tajung ka ka ta shitettsü? Aji oda temeshi laishibaibo ashir, mapa medeni tamangji tasü ta shia angur. Yakob 2:26

Tanü asenok khristanpur aikati Deobar anogo shia tenla-tenji nung kanga merangtepa tenla tajung abenba angudang Arogopurtemi temulung kanga chia bilemer aser repranger, saka item tenlatemji Tsüngrem tsüngdang ochishia tagizüktsüsa abener asü masü, ibajibo pei sasa tang meteta kar. Idakji chia, khristanpur shia-i pei medemsurtem den, pei kiyongertem den, pei yimeryimsangertem den tim libaliroa oteter asü masü? tetezüji kati ka den akhümtsübutepa mesüra süngpu aputepa timi liteter asü masü? ta asüba kanga tongtipang ta angatettsüla. Yamaji temeimtep nung, tangatetba tajung nung liyonga otet nung tang khristan tajung ka ka ta ajatsüba kanga temsüa akümtsü ta temeshi laishibaibo sayur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lotha Baptist Arogo nung Covid vaccine indang seminar agi



March 26, 2021 nü Lotha Baptist Church, Dimapur-i ayongzüka sentong ka agiba sülen shisalen sayurterm- Dr. Rebecca Y. Sema, Dr. Benchilo Ngullie aser Program coordinator, Pastor Yanbemo Lotha nunger den shilem agirtem külemi tangokba noksa nung angur. Iba sentong nung Arogo lenirtem, Theological college balala nungi tesayurtem aser melungtet telok balala nungi nisung 51 aden. Iba sentong nung shilem agia adenertemi pepei tesem nung coronavirus vaccine indang awareness agütsütsü.

Dimapur, March 26 (Agencies): March 25, 2021 nü Lotha Baptist Church, Dimapur-i coronavirus vaccine indang seminar ka ayongzüka agiogo.

Iba sentong nung shisalen sayurtemji Dr. Rebecca Y. Sema aser Dr. Benchilo Ngullie na liasü.

Iba sentong nung jembidang district immunization officer Dimapur, Dr. Rebecca-i, Nagaland ya Khristan state ka lir, anungji nüburtem nem awareness agütsütsü atema Arogotem ya tongtibat sabang ka lir; Arogotemi tanelar chiyungtsü agütsüba dang masü saka nüburtem nem

lenla balala nung osangtsüsang shidak agütsür, ta ashi.

Iba dak sendakba nung lai sentong nung adener ajak dang coronavirus wara koktettsü atema

vaccination indang awareness shidak agütsüba nung yaritepdaktsüner, ta mepishi.

Laisa vaccine dak sendakba nung tongtibat tasüngdangba balala atema telangzüba agüja liasü.

Kasa sentong nung shisalen sayur, district tuberculosis (TB) officer, Dimapur, Dr. Benchilo Ngullie-i, "TB Haregadesh Jeetga campaign" indang

metetdaksüadang, a 2025 küm tashi nungbo TB tashidak samatsütsü atema India sorkar nükjidong yur inyakba indang metetdaksü.

Laisa, TB JAN andolan ya linük nung public health mapatong tulutiba lir, anungji iba mapatong nung stakeholders ajak nem shilem agidaktsüner, ta mepishi.

Iba sentong ya Lotha Baptist Church senior associate pastor, Yanbemo Lotha leniba nung agiba sülen shisa lemsatepba sentong agia liasü.

Iba sentong nung Dimapur kübok Arogo balala, colleges, NGOs aser CMO staff tem ajak senteper nisung 51 aden.

BJP MP Pratap Simha-i jembiba o anema Khristantemi longkak ait



Lok Sabha MP, Pratap Simha-i Khristantem anema jembiba ashishia Bengaluru nung Karnataka Christian Political Leaders Forum nungi züngsemtemi longkak aitba mapang tangokba noksa nung angur.

Bengaluru (Karnataka), March 27 (Agencies): Lok Sabha MP, Pratap Simha-i Khristantem anema o jembiba sülen Karnataka Christian Political Leaders Forum-i iba oji ashishia pa dang tatok meshiang ta takhangba agütsüogo.

Khristan Forum-isa, pai Khristantem dang tatok memeshira Khristantemi pa anema longkak sashia aittsü ta metetdaksüogo.

February 24, 2021 nü Karnataka Development Programme senden nung Simha-i sorkar ketdangsertem dang, tekong nung Kangki keta aliba azük azüker senzürtem jangjatsüla, aser parnok nem sorkar teyari balala magütsütsüla, ta tuyua liasü.

MP Simha-i jembiba o anema tawa Karnataka Christian Political Leaders Forum nungi züngsemtem Maurya Circle,

Bengaluru nung aliba Mahatma Gandhi kürazyanglu anasa adenshir pa anema longkak aito.

Parnoki teka nung Kangki amer MP anema yimiyim ayim aser pa dang, nai Khristantem dang tatok memeshira forum züngsemtemi na adenba sentong ajak nung timtem agütsütsü, ta metetdaksü.

Longkak aitba sentong nungji jembidang Forum lenir, Antony Vikram-i, Khristantem densema tamangba yimsü balala nungi nüburtemi vote agütsüba ajanga dang Pratap Simha Lok Sabha MP aküm, ta ashi.

Anthony-isa, "Onoki saru agütsüba ajanga pai itasen den allowance balala angur. MP-i agütsüba sen agi masü saka nüburtemi saru agütsüba ajanga Khristantem nem sorkar teyari balala agütsür. Pai itemji metettsüla," ta ashi.

"BJP lenir kar dak pei melungba o mashie jembiba yimya keta lir. Iba party nungjagi lenir karibo o tamajung mejembira mesüra tanga yimsü amangertem mezüngmeshia mejembira amoi mouteter. Pratap Simha-i pa democratic inyakyim kübok inyaker ta amadokogo," ta paisa aitsü.

Vikram-i ashiba agi, state aser linük renlokba nung Khristantemi tongtibat shilem agiba pai (Pratap Simha) meteta ali asübo pai iba oji mejembila.

"Kin mesüra tamangba yimsü nung ajemdaker jembibaji lenirji nüburtemi shimba lenir ka memesük, anungji pai tangsa tatok meshitsüla," ta pai takhangba agütsü.

Longkak aitba sentong nungji Dr. Rev Manohar Chandra Prasad aser Anil Antony Christopher na desnema lenirtem aika dena liasü.

ANOGO ABEN TSÜNGREM DEN

NI TALIDAK RENEMI AOER

"Aser kodang ni orr nenok asoshi talidak renemdir, ni kong lidir nenoka yangji alitsü asoshi ni tanaben nenok dangi arutsü." (Yohan 14:3)

Tasüba agi piladaktsüba tashi ya kanga tulu lir.

Tamanger mamanger ajak iba lima toktsür aotsü, saka tamanger ka atema tasüba sülen teimla ka lir aji Kibuba den maneni longjema alitsü. Yisu-i kodang pa nütsüngtem toktsür aotsü indang ashi, parnok temulung raksa liasü (Yohan 14:1). Yisu-i parnok dang mulung süngzük den teimla O agütsüba Kibuba parnok toktsür aobaji kodanga meshilangtsüba atema masü, saka osang tajung kaji asenok pa chirtem asoshi talidak renemi aor. Tamanger ka asoshi osang tajungji tasüba tatembang ka masü, saka tepela nung tanaben Kibuba den ajuruteptsü.

Tanü asenoki asüba ki-bo khen asoshi dang, koda junga asüyonga guarantee atemer, aser tejen akümer, lakadoker. Saka Kibubai yangluba ki nungjibo kodanga tejen makümtsü, aser teti tepela nung alitsü. Yisu Khrista asenok nungi pila aobaji asenok asoshi iba jenjang renemtsü atema pa asenok nungi tama ao. Na-a Kibubai yangluba ki nungji alitsüsa renemdar ma? Kibuba pa talidaki meyipa aoba dang masü, saka asenok atema aoba liasü.

SARASADEM

Temeim Yisu nai onok asoshi teti dang bilemtsür ta tanep iba lesson ajanga angazüker. Ne den teti alitsü nia maneni renemshidi. Amen

Israel nungeri covid madak takok anguba nüngtem nung süia aoba benjung amonger

March 27, 2021: Küm ka tejaklen Giordana Grego'er tsüraburtemi Israel nung süia aoba benjung kanga azüngmeyaka monga liasü, parnoki kinüngertem den iba benjung memongtet, ajisüaka coronavirus wara nungi jenbuba atema pelar; takümbo parnok adenshia wara nungi jenbuba atema Tsüngrem nem tenüngsang agüja süia aoba benjung amonger.

Israel nung nütsüng million 9.3 nungi nütsüng tesadang nem coronavirus vaccine agütsüogo aser iba wara süngjemba agi ketdangsertemi restaurants, hotels, museums aser theaters tanaben lapoktsü melaba den ki telung nung nisung 20 tashibo adenshitsü melaogo.

Italy nungi Israel-i arusang, Grego-i, "Israel nung onok atemabo taküm küm ya tetezü tulu lir, kechiyong yakümbo timtem jenti ajangshiogo. Takümbo onok külemi adenshiteter. Italy nungbo tang tashi linük shibanga lir," ta metetdaksü.

Israel nunger Egypt nung alar tia nungi anitetba nüngtem nung parnoki süia aoba benjung amonger.

Hopta ka piyong benjung ya Honibar (March 27) aonung nungi tenzüker aser April 3, 2021 nü tembangtsü.

Yakümbo Israel nung süia aoba benjung junga memongteti liasü, kechiyong sorkar ketangsertemi synagogues shibangdaksü aser nisung telatet dang adenshitsü melaa liasü.


Israel nung tain nütsüng shilem 80 dak tema nem vaccine agütsüogo, ajisüaka tang tashi nungbo linük nung iba wara mesama.

Ajisüaka Israel nungeri coronavirus wara madak takok ngur ama bilema süia aoba benjung amonger tenzüko.

"Iba ya tetezü tulu keta lir, kechiyong iba ya nüchiso anguba benjung ka dang masü saka kinüngertem adenshia amongba benjung ka lir," ta liberal Orthodox organization Tzohar nung tongti, Rabbi David Stav-i metetdaksü.

"Takümbo kibongtem longjemer. Nüburtem, talisa tantsür-tamburtem kibong züngsemtem den pilar kanga rongjena liasü, ajisüaka ajungbena nüchiso ngua kibong züngsemtem den ajuruteptetba atema kanga pelar," ta paisa shisem.

OLONG PAITEP # 5765



TIPIEN

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _ _ _ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 5764 TELANGZÜBA

TIPIEN :

1. Atang, 3. Akuku, 5. Ajem,
7. Osü, 8. Akok, 10. Nati, 11. Sempa,
12. Itsü, 14. Saru, 17. Aru, 18. Inti,
19. Akong, 20. Senti.

LANGTSÜNGLEN :

2. Tajak, 3. Ayok, 4. Kiset, 6. Maksü,
9. Ama, 10. Nashi, 13. Tarak, 15. Ratet,
16. Sang.



ALOKBA'ER AZÜMESEN AON DEN CHIYUNG

- Sobang** : Ohooooiii... Temba koda chiyungteper kazüteper-ba sudi-do...???
- Alokba** : Ayyyyeee... Temba tanepbo ozü tantsüilai 'azümesen aon' sor liasü-jitera agi dang auso memereptok chiyung meshizük chiyungogo niiii.
- Sobang** : Waaaoo...!!! Temba azümesen aon-jia kechi komala aon akaa ???
- Alokba** : Ayyyyeeee... Ozü tantsüilai sorokchiok mapa ajunga kilir nem dang shiloka yutsür... T.V. Serial reprangdang... Aonji metsü agi manang... Tasen agi tutur... Mersu tashii agi tachila masü... Aserbo tera ronglok... Temba ner tantsüla-a koma'ar ozü tantsüla-bo kilir nem dang shiloka yutsürji... Jang-otsü, metsü-mersu teperitsüba agia meperir... Kechiba süra kilir jagi kecha tapayu mali lalushiponga awazür nung koda...!!!
- Sobang** : Ayyya... Temba ozü tantsüla-bo yamaji masü ako... Kilir aliyongjiasorochiok mapa ajak nung la dena dang inyaker adiii...

Lilir : L.Kika Pongener.

TANÜBO NAI LANGZÜANG

Q. Koba küm nungi World Water Day munga arur?

A.1994 B.1993 C.1990 D.1989

===== (Taruba adok nung onoki langzütsü)

YASHI ADOK TELANGZÜBA : 139

AO OSHI ANGAZÜKDAK:

TANÜ ANGAZÜKTSÜBA OJANG

Apok

(v) Tasen adokba (beget)

* Aori nisung ya long nungi **apok** ta jembir.

Apok

(v) ola tulu adoka jaksaba (burst)

* Tanurtemi benjong nung bomb **apok**.

Tir Yimyim

Happy Birthday

TENÜNG : ETINA LONGCHAR

Tasoba Anogo : 28th March 2013

Küm : 8

Class : 3

School : Pilgrim Higher Secondary

Talidak : Imkonglenden Colony, Dimapur.

Tsüngrem taochi nung jala küm 8 tashi arishi moaja taküm anema len aniba asoshi Tsüngrem tenüng asanger.

Tsüngrem sentsüwangshiba taküm ka asütsü maneni sarasademtsür. Happy Birthday Princess.

~ Temeim Oja, Oba, Sangtor aser Kinungertem.



NAI-A YA METETTER MA?

INDIA NUNG NÜBURTEMI SAPUA AMSHIBA BUDGET
SMARTPHONE (Sen 15,000 tekübok) KAR :

- Poco M3 - 10,999
- Redmi Note 9 - 11,999
- Moto G9 Power - 11,999
- Realme Narzo 20 Pro - 14,999
- Realme 7 - 14,999
- Samsung Galaxy M21 - 13,999
- Samsung Galaxy A12 - 12,999
- Poco M2 Pro - 13,999



SUDOKU # 5808

						1	5										
					5	8		7	9								
6		9															
	6	1	5		3	4	9										
			6		2												
	2	5		4		1		3									
2				6	1			8									
				7		9		1									
3			8		5	2		6									

TELANGZÜBA # 5807

							1	5									
					5	8		7	9								
6		9															
	6	1	5		3	4	9										
			6		2												
	2	5		4		1		3									
2				6	1			8									
				7		9		1									
3			8		5	2		6									

OJANG LUTEP # 5352

- ÜKASWA :
- ANMAPG :
- MAALI :
- ÜSÜTZ :
- GAI :
- SGEÜPANR :
- ANGAMM :
- GWASAN :
- ETEMEMT :
- MAA :

OJANG LUTEP TELANGZÜBA # 5350

AIBELENA INYAKER SASATETA ALIDANG NUNGIBO MEZÜNG
YONGI OZÜNG NUNG ANIDAKANG

TAN HOPTA ATEMA - KOMA SÜLA ?

Q. Asenoka tsümartem amato yimtak dang septepa melii, jokshia jokshia asüyonga,
alu nung dang lia alu ayim nunga koma süla ?Olong 20 shi nung April 02, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



March 27, 2021 nü Bangladesh kübok Gopalganj district nung Ato kilonser, Narendra Modi-i Bangladesh tentetsang, Bangabandhu Sheikh Mujibur Rahman nem akhüm agütsüba sülen tesemdangertem kaket nung pa tebilemba zülua toktsüba noksa nung angur. Kasa noksa nungsa Bangladesh Ato kilonser, Sheikh Hasina-a angur.

Indianung Covid timba-timba puteter; ano nisung 291 süogo

New Delhi, March 27 (Agencies): Tesüiba ghonda 24 tsüngda India nung ano nisung 62,258 dak coronavirus tashidak putetogo aser iba tashidak agi nisung 291 süogo, ta Honibarnep Union Health Ministry-i metetdaksü.

Tang tashi nung linük nung nisung ajak agi 1,19,08,910 dak iba tashidak putetogo.

Joko tesüiba anogo 17 tashi anogo shia nisung timba-timba dak coronavirus tashidak puteta arudar aser tang linük nung teshirangdakpur 4,52,647 kümogo; ano külen iba tashidak agi shiranger anepba shilembo tajemba küma 94.85% dang kümogo.

Tesüiba ghonda 24 tsüngda

nisung 62,258 dak iba tashidak putet aser ibaji yaküm October 16, 2020 sülenbo tang anogo ka kija nung nisung timtiba dak iba tashidak puteter; tesüiba anogo ka tsüngda nungsa iba tashidak agi nisung 291 süogo aser ajak senteperbo iba tashidak agi asür 1,61,240 jungogo.

Yaküm October 16 nü nisung 63,371 dak iba tashidak puteta liasü.

Linük nung iba tashidak agi shiranger ajak agi 1,12,95,023 anepogo aser iba tashidak agi shirangertem asüba shilem 1.35 dang kümogo, ta Health Ministry-isa metetdaksü.

Honibarnü Indian Council of Medical Research-i ashiba agi, March 26, 2021 tashi nung linük

nung samples ajak agi 23,97,69,553 tendangogo aser iba nungji Hokolbarnü samples 11,64,915 tendangba densema lir.

Tesüiba anogo ka tsüngda iba tashidak agi asür 291 nungji Maharashtra nungi 112, Punjab nung 59, Chhattisgarh nung 22, Kerala nung 14 aser Karnataka nung 13 asüba densema lir.

Linük nung coronavirus tashidak agi nisung ajak senteper 1,61,240 süogo aser timtiba asüba state ji Maharashtra (53,907) lir, iba sülen Tamil Nadu (12,650), Karnataka (12,484), Delhi (10,987), West Bengal (10,320), Uttar Pradesh (8,779), Andhra Pradesh (7,203) aser Punjab (6,576) state tem lir.

Tamil Nadu kübok district kar nung ola balaka angashia aika aoksatep

Chennai, March 27 (Agencies): Honibarnü Tamil Nadu kübok Mayiladuthurai, Tiruvarur aser Karaikal district tem nung ola khenyongi balaka angashiba agi nisung aika pusatepa aoksaogo, ta osang ka ajanga metetdaksü. Tetsübu nung nisungtem jenshitepa liasü.

Honibarnep 8:15 ako meta Kuthalam, Mayiladuthurai, Sirkazhi, Kollidam, Porayar, Tarangambadi, Sembanarkoil, Karaikal aser Tiruvarur nung ola tuluka aser khenyongi balala angashia liasü, iba sülen

tesem aika nung nisungtemi langka anokshir ama ajangshia liasü.

Tesem aika nung tzübo, awatsüng aser ayongtem nung tzü metre ishika ajungketa atu; kasa mapang nungji nisung aika pei kidang nungi arrsanga kimai ayazüka alua liasü.

Iba mapang nungji nisungtemi police, revenue, fire aser rescue services dangi call süa osang metetdaksü aser social media nunga nisung aikati parnoki ajangshiba lemsatepa liasü.

Ibaji kechi ajangar tang tashi

nungbo kuli mejangja.

Revenue ketdangsertemibo ibaji tayimtsü ajanga masü mesüra menoknok anokba osang mali, ta ashi. Tang tashi nungbo ketdangsertem official osang kecha memetetdaksü.

Yaküm May ita 28 nunga Tamil Nadu kübok Tirupur nung ola khenyongi balala tashie angashiba agi Tirupur yimti nung alirtem dang masü saka anasa aliba Dharapuram aser Kundadam district nung alirtema kanga aoksatepa liasü. Iba olaji 20 sq km telongtet nungi angashia liasü.



New Delhi, March 27, 2021: Honibarnü India Gate, New Delhi nung Delhi Civil Defence volunteers-i senzüsempongertem nem mask lema agütsüba noksa nung angur.

Linük rongsenkettsüng masü Modi bangsemo dang ainer: Mamata

Kolkata, Metsüremi/March 27 (Agencies): West Bengal Chief Minister aser Trinamool Congress tongti lenir, Mamata Banerjee-i, rongsenkettsüng mainba mapang nung Ato kilonser, Narendra Modi bangsemo dang ainer, ta aitsü.

Paschim Medinipur district nung election nüboyim sentong ka nung jembidang lai, “Pai (Modi) pa Vivekananda ta ashir, khenkhenbo pai pa Rabindranath Tagore ta ashir aser tangbo pai pa nüngtem nung stadium ka tenüng jaloktsüogo. Bangsemo talang ayuba agi shingaiia Rabindranath Tagore mekümtettsü. India nunger rongsenkettsüng mejungi kümogo. Asen linük nung Industrial ainba anenogo, pa indang bangsemo dang ainer. Khenkhen pai Rabindranath Tagore ama sübor aser khenkhen Mahatma Gandhi

ama sübor,” ta ashi.

“BJP pur syndicates ana lir, kati Delhi nungi Gujarat aser UP tashi rara adokdaksür, aser ka indangi ni kechi asütsü? Parnok kolok tera meshidak ta ni bilemer, parnok kolok nung ‘screw’ kar meshidak,” ta lai ashi.

Mamata Banerjee-isa, kobi melii kenü anogo nungbo linük ajak yokdokadoktsü aser Narendra Modi nüngtem nung linük tenüng jaloktsütsü, ta ashi.

Trinamool Congress (TMC) tongti, Mamata-i Purba Medinipur district, kübok Nandigram menden nungi tokteptsü.

March 28 nungi Apirl 1 nü polling metembang tashi la Nandigram nung alitsü, kechiyong BJP-i tanga states nungi nisung tamajunger amshia votes auyatsü sentong lir, ta laisa metetdaksü



Agra, March 27, 2021: Honibarnü Agra nung South Korea Defence Minister, Suh Wook, Army paratroopers exercise agiba reprangtsü arudang pa agizükba noksa nung angur.

PM Modi-i Bangladesh semdangba anema longkak ait; nisung 5 asü

Dhaka/New Delhi, March 27 (Agencies): India Ato kilonser, Narendra Modi-i Bangladesh semdangba anema Bangladesh kübok yimti aika nung longkak ait; police-i longkak aiterem azüoktsü merangdang nisung pongu tepset aser aika yiruogo. Ato kilonser Modi-i Bangladesh semdangba anema lokti tentet aikati tesüiba hopta aika longkak aita arudar. Bangladesh nunger nüchiso ngur küm 50 ajungba benjungmong aser linük tentetsang Sheikh Mujibur Rahman sor küm 100 ajungba sentongtem nung adentsü atema Hokolbarnep Modi Bangladesh tonga ao.

Osangbener den jembidang Hefazar-e-Islam telok nung joint secretary, Azizul Haque Islamabad-i, “Modi-i Bangladesh semdangba anema onoki tesünep nung longkak aitba mapang nung police-i taochi mesayui onok pusemer pongu tepsetogo, anungji Amongnü onoki linük tesem ajungalen longkak aittsü,” ta metetdaksü.

Chittagong yimti nung nisung pezü tepset aser Brahmanbaria district nung nisung ka tepset, ta Islamabad-i metetdaksü. 1971 küm rara nung India-i

Bangladesh nunger sepaitem yaria liasü, iba mapang nungjagi Bangladesh aser India tesendaktep tajungba aküm.

Islamabadi-i, “Modi ya nisung tepseter ka lir aser alia oa yimsüsür ka lir; pa teka nung Muslim nunger azü lir. Babri mosque amakba nunga pai shilem agia lir, anungji pai ozü linük semdangba anema longkak aittsüji onok teinyaktsü mapa lir,” ta Islamabad-i-isa ashi.

Linük yimtiba, Dhaka nunga osangbener asem densema longkak aiter aika yiruogo; Hefazat-e-Islam züngsemtemi Modi anema lenmang nung longkak aita jajatsü merang, aser police-i parnok nokdangtsü atema tear gas khalokja liasü.

Hokolbar sarasadem agiba sülen parnoki Baitul Mukarram mosque nungi longkak aita jajatsü sentong liasü saka police-i nokdangba agi parnok rongnung kari police dak long agi aonba sülen police-ia tashiyim amshi, ta osang angazüker.

Iba dak alia civilian süoshi semer alirtema aikati süng amshia longkak aitertem dak azük. Longkak aitertemi gari aika rongdoktsü; ghonda ana tashi nung ang police-i longkak aitertemji azüokteta liasü.

Myanmar nung longkak aiter 50 tepset



Honibarnü Yangon, Myanmar, nung longkak aiter temi mi remsepba noksa nung angur.

Yangon, Metsüremi/March, 27 (Agencies): Myanmar security force-i Honibarnü longkak aiter 50 tepsetogo, ta osang balala aser tenük kuli agütsürtemi metetdaksüogo.

February 1 nü military-i sorkar atsüngtokba anema longka aiter temi Yangon, Mandalay aser tanga jila balala yimtong nung longkak ait. Longkak aiba sentong nung shilem agira parnok dak tekolak mesera tesülen akhatsü akok ta tekümdaksü metetdaksür liaka parnoki asendenshir longkak aita liasü. Kasa anogo linük general tem Armed Forces Day munga liasü.

"Tanü ya armed force atema maksü anogo ka lir," ta CRPH otongdar Dr. Sasa-i online forum ka nung ashi.

"Tai maketba nisung 300 dak tema tepseta yur military general tem Armed Forces Day

amunger," ta pai ashi.

Honibarnü Yangon kübok Dala tesem nung police station ka kima longkak aitba mapang security force-i longka aiter tem dak injang agi kha nisung pezü khaset. Iba lendong nung nisung 10 yirua liasü, ta news portal-i ashi.

Ano yimti kübok Insein district nung local under-21 football team ka nung asayar lanur ka densema nisung asem tepsetogo, ta kidanger kati Reuters dang ashi.

Kasa mapang nung Mandalay kübok tatalokba balala nung nisung terasem khasetogo, ta Myanmar Now-i metetdaksü.

Maneni Mandalay anasa Sagaing tesem, Lashio jila, Yangon anasa Bago tesem nunga nisung tepsetba osang angazükogo, ta kasa sangdong ajanga metetdaksü.

Myanmar Now-i ashiba agi, Honibarnü nisung tajemba agi 50 bo tepsetogo.

Kasa mapang nung linük yimtiba Naypyitaw nung Armed Forces Day amungba nüngtem nung military parade ka agiba sülen Senior General Min Aung Hlaing-i, election agitsü nangzükogo, ajisüaka mapang tatazkük ka magütsü.

"Democracy kümzüka ayutsü atema linük ajunga den army longjemtsü jangrar," ta state television nung live broadcast asüba mapang general-i ashiba den ketdangsürtemi nüburtem kümzüka ayutsü aser linük nung yimjung bener arutsü merangtsü.

"Takhangba ka atema azütokshi inyakyim benoka security aser linük tamendakdak anokshiba ya tim masü," ta paisa ashi.

ALI AYOKTSÜ LIR		
Tasazük	: 140x190	Lenmang nung kongshia
Jenjang	: 150/sq.feet	Ali atoktsü menüngdak
Tesem	: Tuli Town	Contact: 7005745012

NK-i missile tendangba sensak asemtsü atema anüolen aliba linük temi UNSC dang mepeshi



Washington, Metsüremi/March 27 (Agencies): Anüolen aliba linük aikati UN Security Council (UNSC) dang North Korea-i tawa missile tendangba indang sensak asemtsü mepeshia asüngdangogo.

UNSC senden March 30 nü amentsü renema lir.

"Anüolen aliba linük aikati Mongolbarnü senden amenba mapang North Korea-i tawa missile tendangba indang sensak asemtsü mepeshia asüngdangogo," ta Sputnik sangdong ka ajanga metetdaksü.

Sputnik sangdong ajanga ashiba agi, Brehostibarnü North Korea-i, Japan tzüyim tsütsü projectiles ana akha, koba

tactical guided missiles tasen lir. Deobarnü Pyongyang-isa, Yellow Sea tsütsüleni cruise missiles ana khatokogo.

Japanese defence ministry source ajanga ashiba agi, Brehostibarnü akhaba missile, koba ballistic asütsü ta amanger, iba missile ya North Korea litsü nungi akha. Ano taoba hopta North Korea litsü nungi missile ana tendangogo.

Bodhbarnü South Korea Joint Chiefs of Staff (JCS)-i, March 21 nü North Korea-i anüolen tzükümleni cruise missiles ana khatokogo, koba küm ka tsüngda Pyongyang-i missile tendangba mezüngbuba asütsü aser US tir Joe Biden indang administration tendangba ama angateter, ta ashi.

Egypt yimtiba nung ki ka chirep; nisung 5 asü



Cairo, Metsüremi/March 27 (Agencies): Egypt yimtiba nung Honibarnü tekuben tashi atongtepa tua sür aliba ki ka chirepba sülen nisung pongu asü aser aika yiruogo, ta ketdangsür kati ashi.

El-Salam tesem nung ki chireper aliba nung tekümkürtemi taküm alirtem bushidar, ta Cairo governorate administrative tekolakba Khalid Abdel-Al-i ashi.

Ki chirepba lendong nung nisung 24 yirua parnok ajak temang anepalutsü atema mozükidangi anirogo, ta paisa ashi.

Police temi iba tesem meketbangogo aser osang metetnua senzürtem aser ki chirepba nung sabanga aliba kinungertem iba tesemi maitdaksü sotdar. Iba tesem nung mapa inyaker temi bulldozers amshia ki chireper aliba merkettdar.

Ki chirepba kuli tang tashi mejangjai lir. Iba kiyong nung kitem tamendakdak asadangtsü asoshi engineering committee ka tentetogo, ta Abdel-Al-i ashi.

Ki chirepba ya Egypt nung tang tasen masü, kong jila temeket nung sensakser alidak aser yimdak yimtsüngtem nung ki junga masüba ajanga aiba cireper.

Cairo aser Mediterranean yimti Alexandria nunger amala yimti tulutem nung kisü jensüba maparen ya kanga tajangzük aketba maparen lir, aser iba yongji kisürtemi sen timba azüktsü nükjidong nung aiben building permit zütoka toktsür. Parnoki sorkar nungi temelaba magi ki talila atongtepa süyonga atur.

Sorkari tawa linük ajunga nung ozüng alema ki sür alibatem potetyonga odar aser aibelenertem tepuokdaki yokba den ki aika raksatsüyonga odar.

Covid tashidak menar senden amenba atema Pak PM aitsü



Pakistan Ato Kilonser Imran Khan, coronavirus tashidak menar liaka pa indang media team den senden amenba noksa nung angur.

Islamabad, Metsüremi/March 27 (Agencies): Pakistan Ato Kilonser Imran Khan, coronavirus tashidak menar liaka pa indang media team den senden nung shilem agiba atema opposition aser nüburtem aikati aitsüogo. Covid vaccine agiba sülen anogo ana dang lir arishi küm 68 tain Khan dak taoba Honibarnü coronavirus poteta liasü.

First Lady Bushra Bibi daka kasa anogo coronavirus tashidak potetogo. Khan taoba Brehostibarnü linük ajunga nung anti-coronavirus vaccination campaign kübok China nunger indang Sinopharm vaccine vaccine agi.

Information and Broadcasting minister Shibli Faraz aser ozüng yanglur Faisal Javed nati senden nung agiba noksa social media nung lemsatepba sülen Ato Kilonser aitsü tenzük. Noksa nung Faraz, Javed, Yousuf Baig Mirza aser Zulfiqar Abbas Bukhari densema media team den Khan senden nung shilem agiba nguogo. Pa tanungba ketdangsürtem nungi tatsükabo pilar mena liasü.

Dawn osang kakat sangdong ka ajanga ashiba agi, Khan-i Brehostibarnü par Banigala kidang senden ayongzüka amen. Opposition-i, Ato Kilonser-i standard operating procedures

dak sendakba nung aibelenogo ta ashiba den senden nung adenertemi SPOs nung aibelenba atema parnok anema ken o benoktsü khangogo.

Temetetsükaji quarantine mapang senden ayonga amenba atema sorkar otongdar kati danga Ato Kilonser pusema mejembitet aser parnoki takok tashi iba ken o mejembitsü merang, ta kasa sangdong ajanga metetdaksü. Social media nung nüburtemi PM-i senden ayongzüka agitsü nüngdaka liasü asü ta ashishiogo. Parnoki, video conferencing applications aika lir sürnung pai kechi senden ayonga amen, ta asüngdang.

Asus 'AiO V241EA' aser 'AiO V222' sayaogo



New Delhi, Metsüremi/March 27, 2021 (Agencies): Asus India-i all-in-one PC series - AiO V222 aser premium AiO V241EA sayaogo. AiO V222 nung 10th-gen Intel Core CPUs aser AiO V241EA nung 11th-gen Intel Core CPU inoka yanglutsüogo.

Taiwan nung amenoka aliba company Asus-i ashiba agi, iba PCs tasen ana ajanga customer tem computing aser video conferencing maparen ayongdaksüba den HDMI port ajanga multimedia content talisa TV, console games asayatsü, OTT content, movie tem reprangtsü atema nungitter.

Asus AiO V241EA nung 23.8-inch Full-HD NanoEdge display den 2mm physical bezel design aser 88 percent screen-to-body ratio dena lir. Iba NanoEdge IPS screen yagi 178-degree wide-viewing experience agütsür.

Iba PC nung 11th-Gen Intel Core i7 1165G7 processor den Intel Iris Xe GPU, 16GB RAM aser 512GB PCI-E SSD storage ajanga maparen achaayangtsür. Ano külen, tejangrar temi DVD-ROM aketba alia amshitetsü akok.

Video calling atema iba PC nung 1-megapixel camera aser audio atema dual-speakers

inokja yangluogo. Connectivity atema, Asus AiO V241EA nung dual-band Wi-Fi, LAN den 1000Mbps speed support, USB 3.2 port 4 aser HDMI port ka angutsü. Iba all-in-one PC ya Black-Gold aser White-Sliver colour finish nung angutsü aser PC touzük seret 5.4 lir. India nung iba PC jenjang sen 61,990 alitsü.

Ano külen, Asus AiO V222 nungbo 22-inch frameless Full-HD display den 87 percent screen-to-body ratio inoka yanglutsüogo. Iba PC nung Asus SonicMaster bass-reflex speaker system aser video calling atema HD camera inokja lir. 10th-Gen Intel Core i5-10210U CPU den Nvidia GeForce MX110 GPU, 12GB DDR4 RAM + 1TB SSD storage ajanga AiO V222 maparen achaayangtsür. Asus AiO V222 nung Cortana voice recognition densema Windows 10 dener angutsü. Connectivity atema, iba PC nung HDMI port, USB 3.2 ports 4, dual-band Wi-Fi aser Bluetooth v5 inoktsüogo. India nung Asus AiO V222 jenjang sen 25,990 alitsü.

Mercedes-Benz-i 'A-Class Limousine' saya

Mumbai, Metsüremi/March 27, 2021 (Agencies): India shishilembadak 'A-Class Limousine' ta nüngja agütsüba gari ka Mercedes-Benz-i sayaogo. Iba gari jenjang sen lakh 39.90 (ex-showroom) alitsü. Gari ya engine option asem nung angutsü.

Design tsütsü reprangdangra, gari tejaklen Concave grille, hood nung parallel bonnets line aser angular headlight den gari tesülen integrated spoiler, tri arrow lights aser dual chrome

exhaust angutsü, koba tanga Merces model dang nungi balaka alitsü.

Gari indang cabin nung connected screen tuluka angutsü, koba India nung iba feature ya mezüng agütsür alitsü. Iba den külemi fully digital 10.25-inch instrument cluster aser 10.25-inch touchscreen infotainment system den dashboard tiyong nung MBUX inoka yanglutsüogo. Tanga connectivity atema, gari nung Alexa aser Google Home

angutsü.

Item feature den puteptsüsa, Mercedes-i cabin ajunga nung design balala inoktsüogo. Gari cabin central console nung triple AC vents, AC button console aser touchpad den hand rest inokja lir.

Mercedes A Limo nungsa wireless charging, sunroof, front electric seats den memory function, ambient lighting den tanga feature tasen aika angutsü. OTA update den connect asütsü atema gari nung feature inoksemtsüogo.

Paresh Rawal dak Covid-19 putet



Mumbai, Metsüremi/March 27, 2021 (Agencies): Actor aser politician Paresh Rawal dak coronavirus tashidak tejangja putetogo. Twitter sabang ajanga Paresh-i iba osang sangdonga liasü.

"Tia makai, kü dak COVID-19 positive putet. Tesüiba anogo 10 tejakdang shirnokisa kü den

ajuruteogogo, nenok ajak dang Covid-19 atema tendangadoktsü ni mepishir," ta Hokolbar aonung Paresh-i Twitter ajanga lemsatep.

Tawa, Paresh-i Covid-19 vaccine agiogo.

Iba tashidak nungi Paresh yakta taneptsü angutsü asoshi Twitter nung fans temi

lemsatepogo. Nüngtugu actor Anupam Kher aser film yanglur Ashoke Pandit na densema fans aikati Paresh yakta taneptsü angutsü asoshi lemsatepa liasü.

March 09, 2021 nü Paresh-i Covid-19 vaccine agia liasü. Iba den külemi Vaccine centre ka nung vaccine agiba noksa ka pai lemsatep. "V for vaccines. ! Mapa tajung asoshi Doctor aser Nurse, front line Health care workers aser Scientist ajak dang pelaba metetdaksür. @narendramodi danga pelaba shisemer," ta noksa den Paresh-i iba olen lemsatep.

Industry nung Paresh dak dang masü, saka taoba mapang nunga Bollywood nung nüngtugu nisung aika dak coronavirus tashidak putetba osang angazükogo. Bollywood nung Covid-19 tashidak tejangja puteter rongnung R Madhavan, Aamir Khan, Kartik Aaryan, Manoj Bajpayee aser Satish Kaushik nung dena lir.

Oking Hospital Kohima nung anogo asem surgery sentong ayongzüktsü

Dimapur, Metsüremi/March 27, 2021 (TYO): Alima nung cleft NGO tulutiba - Smile Train India aser külem sendaktepa alir hospital, Shija Hospitals & Research Center, Imphal den Oking Hospital, Kohima longjemer, tebangmechi chimar alirtem (cleft lip and palate patients) atema anogo asem angati surgery sentong ka ayongzüktsü, ta sangdong ka ajanga metetdaksü.

Oking Hospital, Kohima nung, Deobarnü (28.03.2021) nungi tenzüka Mongolbarnü (30.03.2021) tashi anogo asem surgery sentong ya achaayanga agitsü terenemba lir. Tebangmechi chimar alir patient tem atema angati surgery agiba den bendenloksema, mozü angati, Hospital nung amungba aser senzüsensongtsü asoshi teyari agütsütsü.

Cleft Lip aser Palate patient tem, shirnoki angati surgery agitsü mulunga lir, parnoki Smile Train on Toll Free Cleft Helpline: 1800 103 8301 mesüra 7629076763 nung tongteprateptsü akok.

Anogo asem agitsü aliba surgery sentong ya Smile Train partner Shija Hospital indang Nagaland Cleft Outreach Program den Oking Hospital, Kohima longjemer inyaka aruba telemsa 41buba alitsü, koba 2012 küm nungi tenzüka inyaka arudar aser iba telongjem mapatong ajanga Nagaland nung cleft surgery 445 takok ngua agiogo.

Ano külen, 2006 küm nungi shir Manipur aser kidanger

state tem nung Smile Train India aser Shija Hospitals & Research Centre, Imphal longjemer taa kecha magii cleft surgery 4100 dak tema agiogo.

Nagaland Cleft Outreach Program dak sendakba nung, Shija Hospitals, Smile Train Project Director, Dr. Kh. Palin Singh-i, "Tesüiba küm aika tejakdang nungi Smile Train den amalitepa nungita aruba aser taa magii tebangmechi chimar asor tanurtem anepalutsü maongka anguba atema onok pelar. Tebangmechi chimar aliba timtem ya taneptsü angutsü lenmang lir aser iba timtem nungi taneptsü aginur tanur aika lir, saka iba timtem indang aikati mejangjaba den senotsü peria maliba ajanga mapang shitak nung anepalu mesüteter. Nagaland nung tebangmechi chimar asor tanur ajak nem teyari agütsütsü asoshi onok longjemer inyaksü nükjidong lir," ta ashi.

Küm shia India nung tanur 35,000 dak tema tebangmechi chimar asoba asadangteter. Tsürabur tem senotsü peria maliba ajanga tanur meyisa meyi anepalu mesüi yutsür, koba ajanga chiyongtsü achitsü, tangola sashitsü aser o jembitsü timtemer. Ibayongji, tebangmechi chimar alir tanurtem anepalutsü atema Smile Train India-i 'local medical professionals' nem training agütsür. Iba mapatong ajanga, India tesem ajunglen, partner hospital 150 dak tema teyari agia Smile Train India-i free cleft surgery 625,000 dak tema ketdangsüa agiogo.



Kohima, Metsüremi/March 27, 2021: Merükmejuba campaign den atongsema, Honibarnü (27.03.2021), Keep Our City Clean (KOCC) Kohima-i Phoolbari nungi TCP gate tesem tashi nübudok mapa inyakogo. Iba nübudok mapa nung Kohima Ao Baptist Church nungi lanurtem, Yorubami Students' Union Kohima, Kevi Children Home aser temulunger aikati shilem agiogo.

DTCCZunheboto-i shishaliokreju nem kulikaket agütsü

Zunheboto, Metsüremi/March 27, 2021 (TYO): National Tobacco Control Programme (NTCP) indang Tobacco Free Guidelines agizükba atema District Tobacco Control Cell, Zunheboto-i Lizu Aviqato village, Government College, Zunheboto, Government Higher Secondary School, Zunheboto, GMS , Old Town aser Seven Home School nem kulikaket agütsüogo, ta CMO sangdong ka ajanga metetdaksü.

Item kulikaket ya Peter Lichamo, Deputy Commissioner, Zunheboto-i

agüja liasü. School telungtet nung kaketshirtem temesepba chiyongtsü achiba nungi kümzüktsü aser nokdangtsü mechi mapang shia item tetuyuba nung kaketshirtemi anidaksü asoshi team-i nendaka mittsüla, ta DC,Peter Lichamo-i ayongzük.

Iba senden nung Dr Esther Chophy, DNO, NTCP menden liasü. District Level Cordination Committee senden agiba mapang, teloki NTCP indang inyakyimtem asadangshia olemtepogo, ta kasa sangdong ajanga metetdaksü.

CCSA-i PDSA football title kokogo



Kohima, Metsüremi/March 27, 2021: Honibarnü, Centre Chakhesang Sports Association-i 36buba PDSA meet football final koker sülen tangokba noksa ka yangi angur.

Kohima, Metsüremi/March 27, 2021 (TYO): Honibarnü, Thenyizu yim dak 36buba PDSA meet takok ngua tembangogo. Iba meet tatemnübuba nung Centre Chakhesang Sports Association (CCSA)-i Football final asaya takok angu.

Iba final asaya nung, CCSA-i 2-1 agi Secheke Range Sports Association (SRSA) tsükdaktsüba sülen, par teloki Late Vedeyi Nienu Football

trophy agizük.

Hopta junga ayonga agiba 36buba PDSA meet nung, Chokri Area Games & Sports Association (CAGSA)-i medal timba - 28 (10 Gold, 12 silver, 6 bronze) den Group champion title ajangzükteta liasü.

Kasa asayamung nung, Chozuba Area Sports Association (CASA)-i medal 18 (9 Gold, 4 Silver, 5 Bronze) ngua, parnoki tanabuba jenjang

tongtet.

Iba Meet shibangba sentong nung, Football Association of Phek District (FAPD) president Colo Mero aser FAPD vice president Vesupra Kezo nati takok angur team nem sempet lema agütsü.

36buba PDSA meet, koba March 23, 2021 nungi tenzüka asaya, iba asayamung ya CAGSA ajanga ayongzüka liasü, ta sangdong ajanga metetdaksü.

Shooting World Cup: Vijayveer o Tejaswani nati gold angu



New Delhi, Metsüremi/March 27, 2021 (Agencies): Honibarnü, ISSF World Cup - 25m rapid fire pistol mixed team asayamung nung India nung temeyoktep tarep Vijayveer Sidhu aser Tejaswani nati gold medal takok nguogo.

Dr Karni Singh Shooting Range nung, 25m rapid fire pistol temeyoktep tarep gold medal

round toktepba mapang, India nung shooter temeja asaya liasü, kong Vijayveer Sidhu aser Tejaswani nati ayong ayonga dang 9-1 agi Gurpreet Singh aser Ashok Abhidnya Patil tsükdaktsü.

Qualification 2 nung, Gurpreet aser Patil nati point 370 tashi ajangzükteta mezügbuba jenjang tongtet. Kasa mapang

arishi küm 16 tain Tejaswani aser arishi küm 18 tain Sidhu nati point 368 ang ngutet.

Hokolbarnü, tebur kija 25 rapid fire pistol asayamung nung, Sidhu-i külem India nung Anish Bhanwala aser Gurpreet na ajateta silver medal takok angu.

Iba asayamung nung India team-i takok tajung atonga nguyonga aruba den medal tally nung temaba jenjang tongteta lir. Honibar tashi nung India team-i gold 13, silver 8 aser bronze 6 densema medal 27 nguogo.

Tang, New Delhi kübok ayonga agiba ISSF World Cup asayamung nung linük 53 nungi athlete 294 agi shilem agidar. Aruya aliba Tokyo Olympics atema, pistol aser rifle shooter tem atema Shooting World Cup ya tatembangbuba international asayamung ka ama alitsü.

Tendulkar aser Yusuf dak Covid-19 putet

Mumbai, Metsüremi/March 27, 2021 (Agencies): India nung cricket asayar tejen Sachin Tendulkar dak Covid-19 tejangja putetogo aser pa kidang quarantine süa mungdar. Social media sabang ajanga cricket asayar mongin Sachin-i, pa dak alaka kidang adianu shinga dak-a iba tashidak meputet, ta lemsatepogo.

Tawa tembangba Road Safety World Series cricket asayamung nung Sachin Tendulkar lenisüba kübok India Legends-i iba series takok ngua lir. Iba asayamung final nung India Legends-i Sri Lanka Legends tsükdaktsü.

Kasa asayamung nung India Legends nungi külem asayar Yusuf Pathan dak-a COVID-19 tashidak putetogo. Yusuf-i Twitter nung pa dak iba tashidak putetba osang lemsatepa liasü.

"Tanü kü dak COVID-19 putetogo aser iba tashidak temaitsü terara aliba tendangtet. Iba osang angazükli dang, kidang ni quarantine süa mungdar aser doctor temi teyuba nung anidaka tekümdangtsü meratem agidar. Kü ajuruteper ajak dang takaratiba nung Covid-19 atema

tendangadoktsü ni mepishir," ta Twitter nung Yusuf-i lemsatep.

One Day International century' 100 aser Tests century 200 yanglusang, Sachin Tendulkar-i ashiba agi, Covid-19 wara nungi kümzüka alitsü asoshi nüngdakba tekümdangtsü mera ajak agia aru, saka kü dak iba tashidak temaitsü terara aliba meteta aküm.

Honibar (27.03.2021) anepdang Twitter sabang ajanga Tendulkar-i iba osang lemsatepa liasü. Tawa tashi coronavirus tashidak puteter saisaponger nüngtugu rongnung Tendulkar ka alitsü.

"Covid-19 wara nungi kümzüka alitsü mechi tetuyuba mera ajak nung anidaka tendanga aruogo. Ajisiaka, iba tashidak temaitsü agi temang nung timtem agütsüba meteta aruba sülen, kü dak iba tashidak aliba tejangja putet. Tiaka, kidang tanüngba adianu shinga dak iba tashidak meputet. Doctor temi teyuba ama, item mera nung anidaka kidang ni quarantine sudar. Healthcare nübu takotet temi ni yariba aser linük tesem balala nung kü den temeim lemsateper

ajak dang ni pelaba metetdaksür," ta Sachin-i lemsatep.

Taoba küm, India tesem ajunga nung Covid-19 wara anema jakyim ser rarar frontline workers nem aküm agütsütsü asoshi, yaküm Sachin-i pa asoba anogomung mamungtsü lemtet.

Covid-19 wara anema raraba mapatong pusema, Tendulkar-i CM Relief fund nung sen lakh 50 tenla agütsü. Tenla tulu agütsüba den külemi, pai tanga relief maparen balala nung shilem agiogo. Maharashtra aser Mumbai nung nüburtem tsüngda COVID-19 tashidak menatepa odar, kong Hokolbar anogo nisung 36,000 dak iba tashidak aliba tejangja putet.

Cricket wadang tsütsü alima ajungai jangjaa aliba nübu - Tendulkar-i küm 24 tashi International cricket nung shilem agiogo aser iba mapang pai otsü balala yanglua jenjang aika ajangzükteta lir.

Maneni, Tendulkar iba tashidak nungi yakta taneptsü angutsü asoshi fans aikati Twitter sabang nung lemsatepogo.

Miami Open: Osaka-i Ajla kokogo

Miami, Metsüremi/March 27, 2021 (Agencies): Hokolbarnü, Miami Open asayamung tetsür kija Round of 64 asaya nung, Naomi Osaka-i Australia tsür Ajla Tomljanovic madak 7-6 (7/3), 6-4 agi takok nguogo.

Osaka-i taoba ita Australian Open 2021 tetsür kija asaya final takok ngur sülen, lai Miami Open nung mezüng shilem agir alitsü.

Japan tsür tennis star aser world no. 2 den ATP aser WTA hardcourt asayamung nung seed tanabuba, Osaka-i iba asaya mezüng set nung tera timtema asaya liasü. Ashleigh Barty sülen tanabuba jenjang nung alila Osaka-i tawa Melbourne nung la indang Grand Slam title pezübuba takok anguba sülen, iba asayamung nung Australia tsür Ajla den kanga toktepa asaya tenzü.

Hard Rock Stadium kübok Grandstand Court nung Osaka-i kanga dang meranga rank 77 Tomljanovic den toktepa asaya liasü.

Osaka-i winner' 36 rongnung aces 13 anguba ajanga la aibelenba kar nembangtsü maongka angu aser tasembuba

round nung lai Serbia tsür qualifier Nina Stojanovic den asayatsü temsüa aküm. Tetsür kija asaya tanga ka nung Nina-i Kazakhstan tsür seed 26buba Yulia Putintseva madak 5-7, 7-5, 6-2 agi takok angu.

"Tensa asadanger nüngdakba mapang ni serve junga yok. Tia makai, ni break point kar mengutet, saka asaya nung ni serve junga yoktetba yagi kanga nungitogo aser iba jagi ni kanga pelar," ta Osaka-i ashi.

Iba asaya mezüng game ana nung asayar ana tsüngda break point atema toktepa asayaba sülen, mezüng set indang game pungobuba nung Tomljanovic-i Osaka serve nung maongka agitet aser game tibuba nung break point ka ngua la 5-3 agi Osaka tejakdang kümadok.

Tena tsüngda service game toktepa asayaba sülen, love nung Osaka-i Tomljanovic menepa asaya.

"Australian Open sülen ni atema iba asaya mezüng alitsü aser kü temulung nung tera arendaka ait asünung, ni junga asayatsü lemtet. Set tanabuba nung iba asaya koktetba atema pelar," ta Osaka-i ashi.

IPL 2021 atema Mumbai Indians jersey sayaogo



Mumbai, Metsüremi/March 27, 2021 (Agencies): Ajaki yongya ataba Indian Premier League indang aruya aliba season atema taoba IPL takok angur telok - Mumbai Indians-i Honibarnü team indang jersey sayaogo.

Iba jersey nung 'Universe Earth', 'Water', 'Fire', 'Air' aser 'Sky' indang element pungo ajena lir, koba noksa pungo yagi franchise indang jakla aser sempet sayur.

Iba jersey indang jembiba mapang, team atema otongdar kati ashiba agi, "Küm shia Mumbai Indians pur temaba jenjang ajangzükteta arudar. Pungoben tashi IPL title akokba ya onok dak temulungtetba tulu aliba den franchise atema bendanga agütsür inyakba kuli

sayur aser taküm-a iba jersey ajanga onok tsüngda telongjem aser sempet sayutsü terenemba lir."

"Team indang jersey design asütsü atema onoki kanga junga shisadanger inyaker kechiyong asayartem aser fans temi iba jersey ya khonang aser mera aketba süoshi ka ama bilema semoker. Tan season, asayartem dak aketba sempet aser jakla atishia jersey nung item temaitsü inoktsü lemtet. Ibaji ajanga tanü linük nung iba franchise takoker ka ama alima matsüngdang onok nümatanga arur," ta otongdari ashi.

Maneni, defending champion Mumbai Indians-i April 9, 2021 nü Royal Challengers Bangalore team den asayatsü terenemba lir.

BILEMDANGANG

"Alima nung aikati mebilemdangi inyaksar tesüang sasaa bilemteter."